

Ad Lectorem.



haberis fortè tam benevole quam
critice Lector post tot in lucem
edita ingentia Theologiæ Scho-
lasticæ volumina, post innume-
ra Typis data magno studio
compilata in sententias Petri Lombardi, in
summam Aquinaticam commentaria in pu-
blicum prodire quoddam theologicæ scien-
tiæ acquirendæ adjumentum, quasi verò hæc
temporum serie quidquam videri posset,
quod à tot doctissimis pariter ac inquirendæ
veritatis studiosissimis viris perspectum non
fuerit; aut litterario orbi tradi, quod eidem
nondum superfluè communicatum fuerit;
vel novum quid inveniri, quod antecedenti-
bus fuerit ignotum; verum mirari desines,
quisquis hæc aut his similia tecum agitas, si
finem exigui hujus operis à me intentum ex-
pendere volueris; novum scribere nec volui
nec debui, qui Patres & Majores meos inter-
rogare jubeor, ut annuntient mihi, qui pro-
bè teneo, omne novum si non falsum saltem de-
falsitate suspectum esse. Verum optima &
optimè scripta novo quodam à sacrâ facultate
Theologicâ Coloniensi tum ad excludendas
sententiarum novitates, tum ad præcavendas
inutiles ac movendas necessarias & utiles.
Quæstiones electo modo publico transmittere
volui. Communibus decretis vetuit laudata
modo facultas alias publicis Disputations
bus

Ad Lectorem.

bus in patente Theologiæ auditorio Theses proponi, nisi quæ forent resolutiones Quæstionum in ordinem redactarum desumptæ vel ex summâ Doctoris Angelici vel ex assertionibus Anno 1638. jussu facultatis Theologiæ editis, aut pro exigentiâ materiæ ex Concilio Tridentino vel jure Canonico. Quo decreto hoc certè obtinuit, ut quævis novitates procul à publicis Disputationibus abessent, ac nonnisi recepta majorum propugnarentur dogmata. Huic proposito conformiter è re fore judicarunt tam communis quam privati per generales Disputationes augendi profectûs studiosi, si secundum sacræ facultatis ordinem obviæ singularum Quæstionum resolutiones & explicationes Candidatis exhiberentur, quod modo intendo, an assequar, aliis dijudicandum relinquo. Ducem in hâc methodo cum laude memoro Eximium Magistrum D. Annonem Schnorrenberg Canonicum Præmonstratensem Ecclesiæ Steinfeldensis piæ memoriæ, dum viveret Ss. Theologiæ Doctorem & Collegii Norbertini Præsidentem, cui etiam maxima hujus Theologiæ Pars (ut fontem, ex quo hauris, coronare ingenuè te moneam) in acceptis est referenda, ut noverint ii, in quorum manibus hujus Viri verè Eximii scripta secundum Theologiæ facultatis Coloniensis ideam digesta adhuc dum versantur, ejus proinde relictâ, quò pluribus servire possent, communicans ejusque

Ad Lectorem.

que plerumque doctrinam sectatus totum opus in aliquot Partes divisum ut æquè foris ac domi commodo sit usui , in Disputationes & Quæstiones dispertiar, respondebitque singulis Quæstionibus una , vel secundum quod res feret, altera Conclusio ex fontibus suprâ indigitatis desumpta, cum tali expositione , quæ sedulam tamen explicantis auscultationem non respuat , sed potius requirat, quin & calamum identidem explicata excipientem, ne, quod animadversum aliquoties fuit, Typus socordiam foveat. In sententiarum delectu ità medium tenebo , ut exoticas ac à studio Colonienâ alienas semper declinem , atque ità proprias stabiliam, ut contrarias minimè, nisi cum Ecclesiâ Catholicâ, damnem. Prolixitatem citationum, quas legentibus nauseam sæpè creare experientia docet, vitabo, non deerunt Authores , in quibus & propriæ & contrariæ opiniones latius videri poterunt. Utere igitur labore hoc humanissime Lector , & si quidem emolumento tuo cedat, quod post Dei gloriam unicè peto , id solum abundantis remunerationis loco reputabo , si verò minus arrideat opus , saltem intentionem improbare non poteris. Errores, si qui fortè diligentiam meam effugerint, ex antecedentibus & consequentibus ipseque sensu prudenter colligere & corrigere poteris , ac memineris humana pleraque imperfectionibus laborare. Vale.

Elen.